

DOMENIE XIV «VIE PAL AN»

Antifone di jentrade Sal 47,10-11

O stin pensant, Diu, al to boncûr
dentri dal to templi.
Come il to non, ancje la tô laut, Diu,
e rive sun dute la tiere;
incolme di justizie e je la tô diestre.

Colete

Diu, che inte umiltât di to Fi
tu âs tornât a tirâ sù il mont che al jere colât,
da ai tiei fedêi une sante contentece
par che a puedin gjoldi pe eternitât
chei che tu âs sfrancjâts de sclavitût dal pecjât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 66,10-14

Ve, o fasarai lâ viers di jê la pâs come che e fos un flum.

Dal libri dal profete Isaie
«Indalegraitsi cun Jerusalem,
e gjoldêt par jê, ducj vualtris che i volês ben!
Gjoldêt plui che o podêc cun jê,
ducj vualtris che o vêc patît par jê!
Par che o podêc tetâ e saceâsi
al pet des sôs consolations,
par che o cjucjais e si consolais
al pet de sô glorie.

Parcè che il Signôr al dîs cussì:
«Ve, o fasarai lâ viers di jê
la pâs come che e fos un flum,
e come un riul che al stranfe
la glorie dai forescj.

O cjucjarêc e o sarêc puartâts tal braç,
e o sarêc niçâts sui zenoi.
Come un fi che la mari lu console,
cussì ancje jo us consolarai vualtris;
a Jerusalem o sarêc consolâts.
O viodarêc e il vuestri cûr al gjoldarà,
i vuestris vues a cjaparan vigorie come la jerbe.
La man dal Signôr si pandarà ai siei fameis». R.
Peraule di Diu.

SALM RESPONSORIÂL dal Salm 65

R. A son propit grandis lis voris dal Signôr.

Cjantait a Diu di dute la tiere,
dal so non cjantait la glorie;
dait sflandôr a la sô laude.
Disêt a Diu: «Cetant bielis che a son lis tôs voris.
Denant di te si plee dute la tiere
e ti cjante a ti, al to non e cjante». **R.**

Sù mo, cjalait i spetacui di Diu:
il so mût di fâ cui fis dai umign che al è une robone.
Al à tramudât il mår in tiere ferme,
il flum lu àn passât a pît.
Sù mo, in lui fasìn fieste!
Cu la sô potence al comande in eterni. **R.**

Sù mo, scoltait, vualtris che o rispietais Diu,
parcè che o vuei contâus ce che lui al à fat pe mê vite.
Benedet seial Diu, che nol à rifudade la mê preiere
e no mi à dineât il so boncûr. **R.**

SECONDE LETURE Ga 6,14-18

O puarti tal gno cuarp i sigjii di Crist.

De letare di san Pauli apuestul ai Galazians

Fradis, par chel che mi rivuarde me, che no mi capiti mai di vantâmi di alc che no sedi la crôs dal Signôr, che midiant di lui il mont al è stât metût in crôs par me e jo pal mont. Di fat ni la circoncision ni la mancjance di circoncision no contin nuie, ma dome il jessi une creature gnove. E chei che a laran indenant cun cheste regule, pâs e misericordie par lôr e pal Israel di Diu. Di chi indenant nissun nol à di lambicâmi: di fat o puarti tal gno cuarp i sigjii di Crist. La gracie dal Signôr nestri Jesù Crist che e sedi cul vuestri spirt, fradis. Amen.
Peraule di Diu.

CJANT AL VANZELI cf. 2 Cor 5,19

R. Aleluia, aleluia.

Al è stât Diu a riconciliâ il mont in Crist,
dantnus a nô la peraule de riconciliazion.

R. Aleluia.

VANZELI Lc 10,1-12.17-20

Al cjaparà la pâs che i augurais.

Dal vanzeli seont Luche

In chê volte, il Signôr al sielzè altris setantedoi dissepui e ju mandà doi par doi denant di sè, in ogni citât e lûc che al stave par visitâ. Ur diseve: «Il racuelt al è bondant, ma lavovents ind è pôcs. Preait alore il paron dal cjamp par che al mandi lavovents pal so racuelt. Lait! Ve, jo us mandi come agnei framieç dai lôfs. No stait a puartâ ni sporte, ni sac, ni sandui. Par strade no stait a saludâ nissun. Cuant che o jentrarès tune ejase, disêt prin di dut: Pâs a cheste ejase. Se li ind è cualchidun che i ten a la pâs, al cjaparà la pâs che i augurais; se no il vuestri auguri nol valarà nuie. Restait in chê ejase, mangjait e bevêt ce che us daran, parcè che il lavorent al à dirit di jessi paiât. No stait a passâ di une ejase in chê altre. Cuant che o larès intune citât, se cualchidun us aceté, mangjait ce che us ufris. Vuarít i malâts che o cjatais e disêtjur: Il ream di Diu al è dongje. Se invezit o jentrarès intune citât e nissun no us acerà, lait fûr in place e disêt: Nô o scjassîn cuintri di vualtris ancje il pulvin de vuestre citât che si è tacât tor dai nestris pîts. Tignît a ments però che il ream di Diu al è dongje. Us garantîs che te dì dal judizi la int di Sodome e sarà tratade cun mancul rigôr che no la int di chê citât.

I setantedoi dissepui a tornarin indaûr plens di gjonde disint: «Signôr, parfin i demonis nus ubidissin, cuant che o clamîn il to non». Lui ur disè: «O viodevi satane a plombâ jù dal cil come un folc. Jo us ài dât il podê di tibiâ sarpints e sgarpions e di fruçâ ogni potence dal nemî. Nuie nol podarà fâus mâl. No stait però a gjoldi parcè che i demonis us stan sot, ma invezit parcè che i vuestris nons a son scrits tai cîi».

Peraule dal Signôr.

Su lis ufiertis

Cheste ufierte consacrade al to non

che nus smondei, Signôr,
e nus puarti di zornade in zornade
viers de vite dal cîl.
Par Crist nestri Signôr.

Antifone a la comunion Sal 33,9

Cerçait e o viodarêts cetant bon che al è il Signôr:
furtunât l'om che li di lui si pare.

Daspò de comunion

Colmâts di tancj regâi, ti preìn, Signôr,
di cjapâ ancje il regâl de salvece
e di no cessâ mai inte tô laude.
Par Crist nestri Signôr.